

# DOBLETE PA TIVOLI CLUB



**ORANJESTAD(AAN):** Cu un publico hopi grandi ayera anochi a tuma lugar den RCA eleccion di reina di carnaval 1997. Candidata di ARUBA TIVOLI CLUB, CATY ARENDS, a wordo eligi como Reina di Carnaval 1997, e di 43 reina di carnaval di nos isla, pero tambe e di siete eligi como reina di Carnaval cu ta bini di cuna di Aruba Tivoli Club, y ademas kibra e empate di seis titulo maximo di Reina di Carnaval, cu Aruba Tivoli Club tabata tin cu Caribe Club. Como Runnerup a resulta e candidata di San Nicolas Rosy Kock, cu masha emociona a ricibi su titulo como si fuera tabata un sorpresa grandi pa su persona di a logra esaki. Rosy a percura pa un regalo grandi pa San Nicolas, principalmente pa e parada di diasabra awor na San Nicolas unda e lo brilla hunto cu e reina di Carnaval di Aruba. E candidata di Oranjestad, Shannon Lopez Penha a logra e titulonon di Best Show y tambe di Best Costume. Indudablemente e tabata masha bunita den su costum di solo cu plumanan y spielnan masha spectacular.. Ayera anochi televidentenan na Aruba por a goza tambe di cada minuut di e eleccion aki, transmiti en vivo y cu a bira algo historico pa nos isla. Cu eleccion di Caty Arends Aruba Tivoli Club a logra su di dos titulo di reina di carnaval e aña aki despues cu siman pasa Jo-An Croes a wordo eligi como reina juvenil di carnaval di Aruba.